

Akilerartarnermi ukiumoortumik naatsorsuutitut ilalu ilanngullugit piumasaqaatit pillugit Namminersorlutik Oqartussat nalunaarutaat nr. 2, 26. februar 2019-imeersaq

Akileraruserinermik ingerlatsineq pillugu Inatsisartut inatsisaanni nr. 11, 2. november 2006-imeersumi § 17, imm. 1 aamma 2, § 18, imm. 1 aamma 2, § 18 a aamma § 83 naapertorlugit aalajangersarneqarput:

Atuuffii

§ 1. Nalunaarummi matumani malittarisassat inuussutissarsiutinik ingerlatsisut suliffeqarfiinut aammalu inuussutissarsiuteqartuni ingerlatseqataasunut soqutigisaqartunut, kommanditselskabini peqataanermigut inuttut akisussaasuusunut, kommanditselskabini peqataasunut killilimmik akisussaaffeqartunut imaluunniit umiarsuaatileqatigiiffinni ingerlatseqataasunut § 6-imi taaneqartunut, aningaasarsianit akilerarutit pillugit Inatsisartut inatsisaanni § 1 imaluunniit § 2 naapertorlugit akilerartussaataasunut, atuupput.

§ 2. Akileraruseriffik akilerartussaataasunut ataasiakkaanut eqimattakkuutaanulluunniit tamakkiisumik ilaannakortumilluunniit nalunaarummi matumani §§7 - 23-mi maleruagassat saneqqunnissaannut immikkut akuersissuteqarsinnaavoq.

Suliffeqarfinnut mikisunut naatsorsuutitut ilassutaasumik paasissutissat

§ 3. Inuinnaat inuussutissarsiummik ingerlataqartut, ukiuni naatsorsuuseriffiusuni marlunni tulleriinni ukiumut 1.000.000 koruunit sinnernagit kaaviiartitaqartut, naatsorsuutini inissiinerit pingaarnerit saqqummiutissavaat.

Imm. 2. Akileraruseriffiup naatsorsuutini inissiinerit pingaarnerit pillugit nalunaaruteqarnissamut allattuiffissatut atugassat sanassavai.

Imm. 3. Naatsorsuutini inissiinerit pingaarnerit pillugit paasissutissiissutit nammineerluni nalunaarummut ilanngullugit nassiuqqassapput.

Imm. 4. Imm. 1-3-imi aalajangersagaq inuussutissarsiuteqartuni ingerlatseqataasunut soqutigisaqartunut, kommanditselskabini peqataanermigut inuttut akisussaasuusunut, kommanditselskabini peqataasunut killilimmik akisussaaffeqartunut imaluunniit umiarsuaatileqatigiiffinni ingerlatseqataasunut, akilerartarnermi ukiumoortumik naatsorsuuserinermik naammassinninnissamut aalajangersakkanik soqutigisaqatigiit ingerlatseqatigiiffiannut, kommanditselskabimut imaluunniit umiarsuaatileqatigiiffimmut ingerlatseqataasumut isumaginnitsitsisunut, atuutinngilaq, takuuk § 6.

Akilerartarnermi ukiumoortumik naatsorsuutitut tunniussineq

§ 4. Akileraruseriffiup nammineerluni nalunaarsuinerit tunngavissanik nakkutilliinerit atugassanik, nammineerluni nalunaarsuinerit tunniussinissamut piffissaliunneqartup

qaangiutinnginnerani, akileraartarnermi naatsorsuutitut piffissaliussamut naammassineqarsimasumut kingullermut ukiumoortumik naatsorsuutit akileraaruseriffimmut tunniussisoqassaaq, taamaattoq takuuk § 5.

Imm. 2. Akileraartarnermi ukiumoortumik naatsorsuutit ukiumoortumillu nalunaarusiaq akileraaruseriffiup atugassatut aalajangersagaanut aammalu qanoq isikkoqarnissaanik aalajangigai naapertorlugit digitalinngorlugit suliaralugit tunniunneqarsinnaapput.

§ 5. Illuutini marluk tikillugit attartortitsiviusumik inuussutissarsiutigalugu ingerlatsivik inuinnarnit ingerlanneqartuuppat, § 4 apeqqutaatinnagu akileraartarnermi ukiumoortumik naatsorsuutit tunniussisoqassanngilaq.

Soqutigisaqartunut, kommanditselskabini peqataanermigut inuttut akisussaasuusunut, kommanditselskabini peqataasut killilimmik akisussaaffeqartunut aamma umiarsuaatileqatigiiffinni ingerlatseqataasunut akileraarutitigut ukiumoortumik naatsorsuutit

§ 6. Soqutigisaqartut, kommanditselskabini peqataanermigut inuttut akisussaasuusut, kommanditselskabini peqataasut killilimmik akisussaaffeqartut aamma umiarsuaatileqatigiiffinni ingerlatseqataasut (peqataasut) akileraartarnermi ukiumoortumik naatsorsuutit pillugit §§ 7-23-mi aalajangersakkat, soqutigisaqatigiit ingerlatseqatigiiffiata, kommanditselskabip imaluunniit umiarsuaatileqatigiiffiup ingerlatseqataasup naammassissagai, toqqarsinnaavaat, taakkualu tamatuma kingorna ukiumoortumik naatsorsuutit naqqiutitaqartut aamma sukumiisumik nassuiaatitaqartut peqataasunut, taakkua isertitaminnik naatsorsuinerannut atugassanngorlugit, tunniutissavaat.

Imm. 2. Peqataasut isertitanik akileraaruteqaataasussanik naatsorsuinerminni soqutigisaqatigiit ingerlatseqatigiiffianit, kommanditselskabimit imaluunniit umiarsuaatileqatigiiffiup ingerlatseqataasumit isertitatik sukumiisumik nassuiaasiussavaat.

Imm. 3. Peqataasut akileraartarnermi piffissanut agguataarineq imaluunniit nalilinnik naatsorsueriaaseq atorunikku imaluunniit akileraartarnermi nalikilliliisimagunik, imm. 1-imi taaneqartut ukiumoortumik naatsorsuutitit allaanerusunik, naqqiinerit tamarmik immikkoortillugit allattorneqassapput.

Akileraartarnermi ukiumoortumik naatsorsuutitut piomasaaqatit nalinginnaasut

§ 7. Akileraartarnermi ukiumoortumik naatsorsuutit, takuuk §§ 10-23:

- 1) akileraaruserinermi tunngaviusut malillugit suliarineqarsimassapput, imaluunniit
- 2) akileraarutitigut naqqiutitigut (allanngortitsinerit) aammalu ukiumoortumik naatsorsuutitit sukumiisumik nassuiaatinik imaqassallutik.

Imm. 2. Akileraartarnermi ukiumoortumik naatsorsuutit paasissutissartaqartut, takuuk § 8, imm. 1, ersarissumik paasiuminartumillu akileraaruseriffiup nakkutiginninneranut tunngavissiisinnassapput.

Imm. 3. Akileraartarnermi ukiumoortumik naatsorsuutitit nuussineq, ukiup siuliani akileraarutitigut naatsorsuinerit ataqatigiinnera paasineqarsinnaanngorlugu, suliarineqassaaq.

Imm. 4. Akileraartarnermi ukiumoortumik naatsorsuutitit ilaatinneqassapput angusanut naatsorsuineq, oqimaaqatigiissitsineq aamma suliffeqarfiup nammineq aningaasaataanni nikerarnerit sukumiisumik nassuiaataat.

§ 8. Akileraartarnermi ukiumoortumik naatsorsuutit kiisalu paasissutissat akileraartarnermi

ukiumoortumik naatsorsuutitut tunngavissani ilaatinneqartut, naatsorsuutini allattukkani imaluunniit tassunga atasumik sukumiisumik nassuiaatini takuneqarsinnaassapput.

Imm. 2. Nalunaarsukkat tamarmik akileraarutitigut naatsorsuineri malinnaaffigineqarsinnaanngorlugit, naatsorsuutini allattuineq aaqqissuunneqassaaq. Akileraarutitigut naatsorsuinerit, katiterneqarfigisaminnit avissaartinneqarsinnaassapput.

§ 9. Paasissutissat § 8, imm. 2-mi taaneqartut, ukiup naatsorsuuseriffiusup naanerani ukiuni 5-ini toqqortarineqassapput.

Imm. 2. Taamaattoq imm. 1-imi aalajangersagaq nioqqutissanik pisiniarfinni suliffeqarfiup karsianit pappialanut allagartanut aammalu ilanngussanut suliffiup iluani atorneqartunut taamaaqataannut atuutinngilaq, taakkua ukiumoortumik naatsorsuutit atsiorneqareernerannit ukiumi 1-imi toqqortarineqartussaallutik.

§ 10. Ilanngaaseereermermi kaaviiartitat nioqqutissanik sullissinernillu ukiup naatsorsuuseriffiusup aallartinnerani naanerani pisassarissat naatsorsuutigalugit naatsorsorneqassapput.

Imm. 2. Ilanngaaseereermermi kaaviiartitat immikkut paasissutissiissutigineqassapput. Allap akiligasaanik suliamik ingerlatamut naligititaq, § 13 naapertorlugu kaaviiartitani ilanngaasikkani iluarsiiffigineqarpat, iluarsiineq immikkut ersersinneqassaaq.

§ 11. Aningaasartuutit, ilanngullugit nioqqutissanik atuineq, aningaasarsiat allallu sulisorisanut aningaasartuutit suuneri malillugit immikkut paasissutissiissutigineqassapput.

Imm. 2. Aningaasartuutit sanaartormik siunertaqartunut atorneqarsimappata, tassunga nuussineq immikkut paasissutissiissutigineqassaaq.

§ 12. Nioqqutissat uninngasuutigineqartut immikkut paasissutissiissutigineqassapput. ´

Imm. 2. Ukiup naatsorsuuseriffiusup naanerani nioqqutissat uninngasuutit ataasiakkaarlugit kisinneqassapput, annertussusaat kisitsineri allattuiffimmi uppersarneqarsinnaassalluni, tassani nioqqutissat ataasiakkaat allassimassallutik aammalu pisariaqarpat suussusersineqarsinnaassallutik.

Imm. 3. Peqqumaasivimmiititat isumannaatumik uninngasuutitut naatsorsuutit assigisaallunniit tunngavigalugit qaqugukkullunniit naatsorsorneqarsinnaappata, kisitsineq ukiup naatsorsuuseriffiusup naanerinnngisaraluani pisinnaavoq.

Imm. 4. Nioqqutissanik uninngasuutit nalinginik naatsorsuineri tunineqarsinnaanngitsut nalinginik ilanngaasoqarsimappat, imaluunniit allat akiligasaanik suliat ingerlasut nalingisa naatsorsorneranni toqqaannartuunngitsumik tunisassiornermi aningaasartuutit, imaluunniit iluanaarutaasussap ilaa, ilanngunneqarsimappata, aningaasat taakkua immikkut paasissutissiissutigineqassapput.

§ 13. Suliffeqarfiup kajumissarneqarnermi, suliat ingerlasut allanit akilernerneqartussat, suliaassiissutitut ataasiakkaanut agguataarlugit, kiisalu naliliineq qanoq ingerlanneqarsimanersoq, nassuiarsinnaasariaqarpaa.

§ 14. Makkua immikkut paasissutissiissutigineqassapput:

- 1) Ukiup naatsorsuuseriffiusup naanerani pisassarissat akiitsullu nioqqutissanut sullissinernullu tunngasut.
- 2) Pisassarissat akiitsullu illuutini qularnaveequsiineri qularnaarneqarsimasut pisassaqtut akiligassaqtullu taallugit qularnaveeqummullu takunnissinnaanissamut pisariaqtunik

paasissutissiissutit.

3) Aningaaserivinnut assigisaannulluunniit aallarniutissatut akiliutit, akileraaruseriffimmut paasissutissat nalunaarutigineqarsimangippata, inissiiviup sumiiffia kontollu normua allallugit.

4) Pappiaqqat nalillit, nalit allangorarnerisigut iluanaarutit annaasaqaatilluunniit akileraaruteqaataasussaasut, pissarsiarineranni akia, nalinga allassimasoq naligititaasullu allallugit.

Pappiaqqat nalillit toqqorsivimmiippata, paasissutissat akileraaruseriffimmut nalunaarutigineqarsimangippata, toqqorsivik aamma taaneqassaaq. Pappiaqqanut nalilinnut erniaqartitaasunut, aallaqqaammut aningaasat amerlassusii imaluunniit akiitsut sinneri danskit aningaasaannut iluarsineqarsimasut, pilersinneqarneranni erniaritinneqartut allanneqassapput.

5) Pisassarisat allat imaluunniit akiitsut allat.

Imm. 2. Akiitsoqartunit paasineqartunik annaasaqaatinik ilimagineqartunilluunniit annaasaqaatigissanganik nalikilliliissutit immikkut allanneqassapput.

§ 15. Pigisat akileraarutitigut nalikilliliivigineqarsinnaasut, nalikilliliinermut tunngavigisat nakkutiginnissaannut atugassanik immikkoortitaarlugit naatsorsuiffigineqassapput pisariaqartunik nalikilliliinerillu naatsorsorneqarnerannut paasissutissiilluni.

Imm. 2. Illuutinut aalaakkaasunut, umiarsuarnut timmisartunullu akileraarutitigut nalikilliliinernut aamma pigisamik piffissap piginnittuuffigisap tamakkiisup nalaani nalikilliliinerit nalunaarutigineqarlutik nassuiaatissiineqassaaq.

§ 16. Suliffeqarfik Kalaallit Nunaata avataani pigisaqarpat, tamanna immikkut nalunaarutigineqassaaq:

1) pigisap pissarsiarineranut akia 25.000 koruunit sinnersimappagit, aamma

2) paasissutissaq taanna suliffeqarfiup ukiumoortumik naatsorsuutaanni ersinngippat.

Imm. 2. Arlaqartunik pigisaqartoqarpat, pigisat suuneri naapertorlugit paasissutissiissutit immikkoortinneqassapput.

§ 17. Namminerisanik aningaasaatit naatsorsorneranni nioqqutissanik nammineq atuineq aningaasartuutinullu peqataanerit il. il. immikkut takutinneqassapput.

§ 18. Aningaasartuutit isertitallu allattukkat akornanni imaluunniit pigisat akiligassallu akornanni pisassanik imaluunniit akiligassanik ilanngussisoqarsimappat, ilanngaasiinnginnermi kisitsisit takutinneqassapput.

§ 19. Makkua immikkut allanneqassapput:

1) Ilassinninnermut aningaasartuutit.

2) Angalanernut ilaalu ilanngullugit ajunngitsorsiat akileraaruteqaataasusaaingitsut.

§ 20. Isertitat aningaasartuutillu, nalinginnaasumik ingerlatsinermut allaanerusuneersut, nalunaarsukkat immikkut ittut takutinneqassapput aammalu pingaaruteqanngitsumik sunniuteqartussaasimangippata, taakkua suuneri malillugit sukumiisumik allatorneqassallutik. Taamaattoq taamatut agguaanissaq aningaasaqarnermut suliffeqarfinnut atuutinngilaq.

Paasissutissat akileraaruseriffimmut nalunaarutigineqartut naligiissaarneqarnerat

§ 21. Nalunaaruteqartussaataitaasut immikkut aningaasarsiat aamma akissarsiat ilaalu ilanngullugit,

ukiumoortumik naatsorsuutini ilaasut paasissutissiissutigissavaat, aammalu akileraaruserinermik ingerlatsineq pillugu Inatsisartut inatsisaanni § 30, imm. 1 aamma 3, aamma § 30 a malillugit aningaasarsianut akissarsianullu ilaalu ilanngullugit akileraaruseriffimmut nalunaarutigineqarsimasunut naligiissaarineq takutissallugu, takuuk aningaasarsianit akileraarutit pillugit paasissutissanik akileraaruseriffimmut nalunaaruteqartarneq pillugu nalunaarut.

§ 22. Ernianik nalunaarutiginnittussaataasut kaammattorneqarnermikkut ernianit isertitat aamma ernianut aningaasartuutit, ukiumoortumik naatsorsuutini ilaasut, paasissutissiissutigissavaat, aammalu aningaasarsianit akileraarutit pillugit paasissutissanik akileraaruseriffimmut nalunaaruteqartarneq pillugu nalunaarummi maleruagassat malillugit ernianut akileraaruseriffimmut nalunaarutigineqarsimasunut naligiissassallugit.

§ 23. § 21-imi aamma § 22-mi taaneqartutut nalunaarutiginnittussaataasup ukioq naatsorsuusiorfiusoq qaammatsiutit malillugit ukiumit allaanersuq atorsimaguniuk, aningaasartat nalunaarutigineqartut qaammatsiutit malillugit ukiup ilaanut naatsorsuusiorfiusumut qanoq agguarsimanersut, immikkut paasissutissiissutigissavaa.

Akiligassiissutinut il. il. piumasaqaatit minnerpaaffissaat

§ 24. Tunisanut ataasiakkaanut tamanut tuniniaasoq akiligassiisummik tunniussisassaaq, pisisoq suliffeqarfik inuussutissarsiornermik ingerlataqartoq allaanersuq imaluunniit inuinnaanersuq apequtaatinnagu, taamaattoq takuuk § 25.

Imm. 2. Akiligassiissut makkuninnga atuaruminartunik imaqassaaq:

- 1) Akiligassiissutip tunniunneqarneranut ulloq.
- 2) Tulleriinnik normulerlugit normulersuineq, paatsuugassaannngitsumik akiligassiisummik suussusersiiviususaaq.
- 3) Tunisip nalunaarsorneqarnermini normua (CVR-nr. mv.) aamma attaveqarfissamut paasissutissat tassaasut atia, najugaa immaqalu oqarasuaatip normua aamma e-mailadresse.
- 4) Nioqqtissat imaluunniit sullissinerit tunniunneqartut annertussusaat suunerilu
- 5) Tunisinermi aningaasartai tamarmiusut.
- 6) Pisisumut attaveqarfissamut paasissutissat tassaasut atia, najugaa immaqalu oqarasuaatip normua aamma e-mailadresse.
- 7) Ulloq tunniussiviusoq, ulloq taanna akiligassiissutip tunniunneqarnerata ulluanit allaanerusimappat.

Imm. 3. Nioqqtissanik sullissinernillu tunisinernut immikkut ittunut arlalinnut qaammatsiutit malillugit ukiup ataatsip iluani pisisumut ataatsimut ataatsimoortumik akiligassiisummik tunniussisoqarsinnaavoq. Imm. 2 taamatuttaaq akiligassiisummut ataatsimoortumut atuuppoq, taamaattoq nioqqtissat imaluunniit sullissinerit annertussusaat aamma ulloq tunniussiviusoq, assersuutigalugu allagartaani malittaatinneqartumi, akiligassiisummut ataatsimoortumut ilanngullugu paarineqartumi, ilanngussap ataaniittumi takuneqarsinnaappat naammalluni.

Imm. 4. Parlaateqatigiilluni niuernermi, aappaa illuatungeriit tamarmik nalunaarsorneqarnermini normui akiligassiisummi allassimallutik, akiligassiisummik tunniussippat, naammappoq. Parlaasseqatigiilluni niuerneq paasineqassaaq tassaasoq, nioqqtissanik sullissinernillu tamakkiisumik ilaannaasumilluunniit nioqqtissat imaluunniit sullissinerit allat akiliutigalugit, tunisineq.

Imm. 5. Akiliinermi ilanngusaaq tassaavoq akiligassiissut, tassani pisisoq tunisisoq sinnerlugu

akiligassiissummik tunniussilluni. Akiliinermi ilanngussaq, sioqqutsisumik pisisup tunisisullu akornanni isumaqatigiissuteqartoqarsimappat imaluunniit inuussutissarsiummi ileqqusut malinneqarpata, atorneqarsinnaavoq. Imm. 2 taamaaqataanik akiliinermi ilanngussamik atuinnermut atuuppoq. Tamatuma saniatigut akiliinermi ilanngussami pisisup nalunaarsorneqarnermini normua (CVR-nr. il. il) allassimassaaq aammalu akiliinermi ilanngussaq pineqartoq takuneqarsinnaassalluni.

Imm. 6. Akiliinermi ilanngussaq pisisup tunisisullu akornanni isumaqatigiissuteqarneq tunngavigalugu tunniunneqarpat, isumaqatigiissut taamaattoq allaganngorlugu pigineqassaaq aammalu illuatungeriit tamarmik isumaqatigiissutip pappialartaanik tigummisaqassapput. Ileqqut malinneqartut imaluunniit pilersuinnermut tunngasut pineqartillugit, nioqqutissamik tunniussinnermut akinillu aalajangersaanermut malittarisassatigut assigisaatigullu maleruagassat assigiillutik, tamanna allaganngorlugu isumaqatigiissummut sanillinneqassaaq, akiliinermi ilanngussamik tunniussinnermut tunngavissaliisnaassalluni.

Imm. 7. Akiligassiissutit aamma akiliinermi ilanngussaq tunniunneqassaaq, nioqqutissaq imaluunniit sullissineq tunniunneqareerpat imaluunniit tamatuma kingorna piaartumik. Akiligassiineq inuussutissarsiummi ileqqorineqartunit nalinginnaasunit kingusinnerusukkut pissanngilaq.

Imm. 8. Akiligassiissutip allannngortinneqarnera kreditnotamik tunniussinikkut pissaaq, tassani immikkuullarissumik paatsuugassaanngitsumillu akiligassiissutaaqqaartoq allannngortinneqassalluni. Akiligassiissutip tunniunneqareernerani nioqqutissamik utertitsisoqarpat imaluunniit nioqqutissap imaluunniit sullissinerup akikillineqarnerani, kreditnota tunniunneqassaaq. Imm. 2 kreditnotanut taamaaqataanik atuuppoq. Tamatuma saniatigut kreditnota, ulloq tunniunneqarfia aamma normua allallugit, akiligassiissutaaqqaartumut akiligassiissutigineqartunulluunniit innersuussinnermik imaqassaaq.

Imm. 9. Akiligassiissutit, kreditnotat aamma akiliinermi ilanngussat marlungorlugit tunniunneqassapput, aappaa pisisumut tunniunneqassalluni aappaalu tunisisumiissalluni. Akiligassiissutit, kreditnotat akiliinermilu uppernarsaatit qarasaasiakkut isumagineqarlutillu qarasaasiami toqqortaatigineqarsinnaapput.

§ 25. Tunisisup § 24, imm. 1-imi aamma 2-mi piumasaqaatit saneqqussinnaavai, ilaatinneqanngitsut makkua arlaat atuussimappat:

- 1) Inuussutissarsiornermi ileqqusut malillugit allatut normulersuinnermik atuisoqarpat, assersuutigalugu atuisut normui imaluunniit attartortut normui, akiligassiissutit tulleriinnik normulersorneqarnissaat pillugu § 24, imm. 2, nr. 2-mi piumasaqaat malinnginneqarsinnaavoq. Attartornermik isumaqatigiissut, § 24, imm. 2 naapertorlugu ilusiliussanik naammassinnittoq, akiligassiisaqattaarnermut taarsiullugu atorneqarsinnaavoq.
- 2) Tunisisoq, atuisartunut inuinnartut taamaallaat imaluunniit annertunerpaatigut tunisisarpat, tunisanik nalunaarsueriaatsimik atuisinnaavoq, assersuutigalugu kasseapparat, aammalu karsimit allagartaq paasissutissanik § 24, imm. 2-mi taaneqartunik imaqartoq tunniullugu, ilaanatik paasissutissat nr. 2, nr. 6-imi aamma nr. 7-imi aalajangersakkamiittut. Karsip allagartaani tunisisup atia imaluunniit nalunaarsorneqarnermini normua allassimassasoq, tunisisup aamma toqqarsinnaavaa.
- 3) Nr. 2-mi taaneqartutut paasissutissanik imalimmik karsip allagartaanik tunniussinissaq teknikkikkut ajornartillugu, atuisartunut inuinnarnut tunisisup tamatumunnga taarsiullugu karsip allagartaanalinginnaasoq makkuninnga paasissutissartaqartoq tunniussinavaa: ulloq, tunisisup atia

imaluunniit nalunaarsorneqarnermini normua aamma tunisinermi aningaasartaasa annertussusaat.

4) Atuisartunut inuinnarnut tunisinermi tunisinermi nalunaarsueriaatsimik atuisoqangippat, assersuutigalugu kasseapparat, aammalu tunisineq 1.000 kr. inorlugu aningaasartaqarpat, tamatumunnga taarsiullugu tunisisoq atuaruminartumik assaannarnik allatamik allagartamik tunniussisinnaavoq, makkuninnga paasissutissartaqartumik: ulloq, normulersuineq, tunisisup atia aamma nalunaarsorneqarnerani normua aamma tunisinermi aningaasartaasa annertussusaat. § 24, imm. 1 naapertorlugu, pisisup akiligassiisummik piumasaqarnerani, tunisinermi aningaasartaasa annertussusaat apeqqaatinnagu, tamatigut akiligassiisummik tunniussisoqartartussaavoq.

§ 26. Isertitat akileraaruteqaataasussat naatsorsorneqarnerani pisisup, nioqutissanik sullissinernillu suliffeqarfimmit inuussutissarsiornermik ingerlatsisumit il. il. pisineranut aningaasartuutunik, ilanngaatiginninnissaanut, akiligassiisummik §§ 24-imi imaluunniit 25-imi piumasaqaatinik naammassinnittumik, tunniussisoqarsimanissaa piumasaqaataavoq.

Pineqaatissiisarnernut aalajangersakkat

§ 27. Piaaraluni imaluunniit mianersuaalliorujussuarluni, § 3, imm. 1-imi, § 4, imm. 1-imi, § 6, imm. 2-mik aamma 3-mik, § 7, imm. 1-imi aamma 3-mik, imaluunniit §§ 8-26-mik unioqutitsisoq, Kalaallit Nunaannut pinerluttulerinermut inatsimmi maleruagassat malillugit akiliisitsinermik pineqaatissinneqarsinnaavoq.

Imm. 2. Inatsisartut inatsisaanni imaluunniit Inatsisartut inatsisaat malillugit peqqussutini akiligassiinissaq tunngavissillugu aalajangersaasoqarsimappat, akiligassiineq Kalaallit Nunaannut pinerluttulerinermut inatsimmi maleruagassat malillugit pisussaataasumut pisinnaatitaasumullu pisussaaffiliunneqarsinnaavoq.

Imm. 3. Imm. 1-2 malillugit suliassat Kalaallit Nunaanni Eqqartuussivinni siullertut sularinnittussamut suliakkiissutigineqassapput.

Imm. 4. Akiligassiinerit, imm. 1-2 malilugit aalajangersarneqartut Nunap karsianut tutsinneqassapput.

Atuutilerpera, ikaarsaarnermut atorunnaarsitsinermullu aalajangersakkat

§ 28. Nalunaarut ulloq 1. marts 2019 atuutilerpoq.

Imm. 2. § 3 ukioq isertitaqarfiusoq 2019 aallarnerfigalugu isertitanik akileraaruteqaataasussanik naatsorsuinermtu atuuppoq.

Imm. 3. § 26 ukioq isertitaqarfiusoq 2020 aallarnerfigalugu isertitanik akileraaruteqaataasussanik naatsorsuinermtu atuuppoq.

Imm. 4. Peqatigisaanik Namminersornerullutik Oqartussat Akileraartarnermi ukiumoortumik naatsorsuutitut il. il. piumasaqaatit pillugit nalunaarutaat nr. 27, 1. december 2006-imeersoq atorunnaarsinneqarpoq.

Vittus Qujaukitsoq

/

Nikolai S. Christensen